

戚少保年譜耆編

戚少保年譜耆編卷之十

閩嗣祚國彙纂

緹嗣昌國集錄

廩嗣報國詳訂

庠嗣興國叅較

隆慶六年壬申家嚴四十五歲

春正月題奏取用被劾戰裨辯誣疏

臣近覩邸報該福建巡按杜御史因取用爲事官
金科朱珪王如龍募兵赴薊諭臣敢於行私委曲
庇護臣一聞之不勝駭愕切照武弁者今時之賤

官也言官者朝廷之耳目也宦成官怠節改窮途尤才智之所難免臣何敢辯况臣官居介胄之先階列大夫之後有則改之無則加勉益竭犬馬之力盡省躬圖報之忱臣之分也語云公論久而自明蓋棺後事方定臣之心跡卽不能明於生前必能明於蓋棺之後卽不能明於齒頰自當明於天地鬼神臣何必辯緣臣人品心術恆兢兢業業求無愧於古人實不敢以升夫自畫耳矧薊鎮何地皇都陵寢在焉天下之重地也一牆之外卽爲虜庭列塞之重邊也鎮守薊州等處何官也延袤二

千餘里主客十條萬衆武弁中之重任也陛下舉重地重任而畀之悍禦之臣卽擇才識兼著者尙未能盡釋東顧之憂詎可以志怠宦成貪婪日暮之人姑容於位乎皇上詎不念重地而別求才識之將以當薦關之任乎此則臣所謂何敢辯何必辯者也但金科等改擬巡撫衙門提問因以誣臣而並誣本兵等官且事干名義此臣不得不辯也兼以募取南兵舉用將領衆已在途事關邊計此又臣不敢不辯也臣請披懸肝膽具陳願末哀鳴於君父之前切念臣起自衛寮弱冠事邊遂擢備

倭都司尋改淛江僉書繼推叅將正巨寇徐海王
直等勾倭猖獗之秋其時遼瀋南北狼土等兵每
與倭戰得失相當兵寇並擾東南爲之騷動臣不
揣顙愚始倡練土兵之請比蒙軍門首是其議不
奪羣言遂收實効臣得因人成事比於召募之初
首先應聘身充總哨之役者則王如龍金科朱珏
等也內王如龍朱珏俱起自編氓金科起自學校
其他見任物故姑且勿論朱珏驍勇知義台州花
街之戰乃練兵初出第一捷珏劍盾當先賊擲金
以餌珏恐分士心投之江中一人而斬七級金科

清修飭身紀律馭眾捐貲犒士卒族卽戎福建牛
田大捷親斬渠魁雙劍潭廣東南澳破巢力抗賊
首吳平每戰多有奇功料敵常得上策王如龍驍
勇絕倫國士無雙嘉靖四十等年復福建已陷之
七城解仙遊幾破之危邑殲吳平之劇寇搗龍頭
之堅巢皆其首功且一月三捷並不矜誇散財養
士夙同甘苦四省百戰莫不爲首三將功次已經
節年按臣覈實陸續題奉欽依部冊可查又該臣
共臨矢石耳聞日覩固不能爲之張大若曰見敵
而股慄臣實未敢知也隆慶元年臣以福建總兵

官蒙恩取入京營王如龍等俱仍舊任其時代臣
鎮守者乃循資敘擢而科等立功地方頗久以夙
將而事新帥禮貌之間未免參商此則科等取禍
之源也以此必欲爲一網盡打之術三將遂爾先
後下獄矣見有福建節年各將領報揭足徵除王
如龍隨該原諭撫臣塗澤民謠無指實知爲誣枉
遂自認風聞奏保復任事後屢立戰功亦載部冊
再問已明卻乃復布一言加以三木寇至則命之
出師寇去則收之狴犴今將五年至於朱珏金科
乃御史蒙詔於隆慶五年三月內所論夫按臣論

劾三司事必機密疏函出境鬼神莫知命下該科
發抄送部方有邸報臣在薊鎮去京畿四百里卽
知之而往返且七八日矣况福建去京七千餘里
聞報而送銀與臣臣又爲之轉送按日計地不待
智者而知其不能特忌者因有巡按提問之旨遂
以此激怒巡按行其中傷之計而巡按不察耳且
薊於隆慶二年召募南兵三千分地布守去秋以
來因科道諸臣痛言衛兵當減臣與督撫身肩薊
任筭無可施乃因踐更之期請爲加取之計督撫
爲之具奏部司爲之題行無非以臣從事東南二

十餘年先後在薊且七八畧經歷百十餘戰濱及二十餘死揣摩南北軍士之情形酌量倭舟虜馬之伎倆稍有一得方見允從復蒙部覆令臣舉報堪任將領具呈軍門題請推用又無非以臣習知南卒之情而必得善馭之將庶克收萬全之効夫求精兵而不求能將是徒勞與徒費耳本部任重責成之意爲何如臣亦知爲不可自諉之責苟有能將堪充是任古人內舉不避親外舉不避讐盜賊工胥皆所不棄有如龍科珏等又係南兵舊頭目臣何暇顧忌嫌疑而不爲皇上舉之哉計議南

兵肇於九月初七日覆令臣開報將領卽本月二十四日前後不過一十七日羈閩之罪犯何由先事而知求進之賄賂安能神輸而至此其爲誣又可知也且武臣之黜陟原與文臣不同使貪使過皆所甄錄臣每見失機詔獄將官往往出之罔罔授以桴鼓而被論將領充爲事官領兵者歷歷可數其本罪固在也隆慶四年四月內該兵部都給事中溫純議題兵部覆奉欽依許令邊腹總兵但有所知無拘兒任隱逸及被論聽勘革棄等項人員俱得據實徑自奏薦以憑本部評品推用何嘗

拘於繩墨以誤邊疆之計如三將之忠勇才智立功閩浙求之武弁實罕其倫獎拔而用之猶恨其少奈何相繼逮治填塞狴犴狂鳥未盡而藏鳥兔方馳而烹狗何以使人効力甚至加以無兄盜嫂之誣實解忠臣志士之體臣雖愚劣頗知自持往於閩中破壘之時寇賊盈野臣恐將士惑心或焚或棄略無顧視臣苟貪得顧不於此時取不貲之財而乃今日動千金之念乎臣之用南人所以得其死力一呼數萬而莫後去家萬里而不辭杖毳犯者而不怨是豈真爲升合之養乎蓋有大義存焉

若用二將而必千金竊恐有慾無剛威撓令阻縛
爲生身之父母恐不能犯之以難况兵凶戰危寒
苦遠戍之役歟此臣前所謂何敢辯何必辯者是
也臣又聞之四時之序成功者退邊陲以安不如
福將臣徇馬微驅自當爲國捐糜以報世豢禁先
在東南已爲暑溼所中今歷薊北跋歷衝險寒暑
勿替虛弱因循每至吐血年雖未衰傷損已甚節
經呈請軍門委官代署卷案可查特以任艱責重
未敢遽爲具奏乃今志雖未忘而宦則叨成守雖
未壞而名果有損在得之年將臨當關之寄實忝

且恐傳笑外夷反爲中國之恥况加臣以干犯名
義之事而本兵撫憲等官悉因三將遷怒臣豈敢
一日覲顏繼位以辱國乎此臣所謂不得不辯不
敢不辯者也伏望皇上將臣特賜罷斥以全言官
之體別選名將以膺是任臣懸之幸邊方之幸也
再照遷募南兵精勇殆萬計今已屬起程千里長
途繁華內地臣恐此報一傳三將或懷疑畏鈐屬
爲難誤事匪細伏望皇上軫念畿甸干繫軍情勅
下該部催行總統監軍等官嚴責諸將早督赴邊
俟到鎮之後將金科等解送法司究其通賄事情

以明心跡臣無任激切懇祈之至

二月誓師會盟於神

隆慶壬申某月某日具官某等謹誓告於漢壽亭
侯關公之神曰某等厚荷國恩叨爲將領居三軍
之上乃父母之司義共死生責兼教養且所轄地
方二千餘里所督軍兵五標十二路主客偏裨殆
以數十計軍民兵勇且十萬餘而醜虜不時侵犯
其勢常倍我軍故禦眾非眾弗克敵強非堅弗能
合眾益堅非上下交信弗行非行伍齊一弗効非
士卒感畏弗得手足之助薊鎮故套正與此相背

馳比辛未春業已告虔於神報應不施人無忌憚
類弊沿習至今弗改其將領士卒若奉祝越全忘
父母教養之責迺無痛癢相關之情惟恣意科斂
以供餽送分類蒐索以需造作極力咨詢以奉奔
走俯首傾伺以徇好惡至於隨處差委員役輒榜
惶以應取一時之悅免目下之讒倒瀆造冊常例
使用紛然百種不可毛舉卻將實事一毫不爲夫
我國家厚祿養將士付以當關之責而爲三軍父
母之司忍今陵替至此何以俯仰天地間乎使軍
士救死不贍勇氣何從而生耶且五標十二路人

衛班操相率以是爲得計視神之威國之紀主將
之賞罰不啻浮雲飄風罔知警省不得也再率偏
裨輩重誓於神願緩譴於前嚴察於後自茲以往
若無真心軫念士卒飾虛文以欺神人南北分爲
兩途愛憎有所偏重故縱偏裨差委之徒知而不
究神其速加冥報如後所云凡我偏裨自協副叅
遊都守提調等官而下必廉以禔身儉以節費公
以給餉任怨以禁利歛多方以察饑寒無依之軍
爲之優恤寬養以保其生力痛止額外需求供應
使用打點當月餽送之類省一分則軍受一分之

惠俾窮邊殘喘日漸蘇息庶可以親上死長之道
而責之用命鋒鏑之間如或仍前不推心任事不
齊志協力不撫恤調停額外徵求巧爲餽送至倒
籜造冊打點使用之類科斂不已及各委用到營
索賄生事者各官不併力禁止不從實結報願神
鑒察立降災禍以償其報况一人致慮誠難週遍
若不仰藉於神明則邊圉之長城卒不可恃偏裨
之故態卒不可祛士卒之狼狽卒不可起神能不
哀之惟神正直英武莫之與京率土之廣萬世之
後儼焉如在感而遂通必不辜予小子之禱

議收補

照得各省解到軍人惟隸督撫鎮協標兵併各副總叅遊營伍者頗稱安閑柰今撫鎮協守標兵不足取諸各路名曰調操而各路無兵矣叅遊標兵不足取諸各提名曰團操而各提無兵矣爲今之計合行清軍衙門將清軍士通解軍門應發馬蘭以西至昌平一帶者聽軍門就近定衛應發松棚以東至山海一帶者軍門驗過咨巡撫就近定衛至於收補之序先遵化三屯建昌石匣諸營查其額數以解到新軍發練易出調操尖夜以還各路

次則各路查其原無標兵如遇松棚古北牆子嶺
曹家寨黃花鎮等處以新軍酌發收練易出捉調
之兵以還各提久次三屯遵化密雲各轄重營及
車營不足悉與撥補如再有餘每兵備駐劄之地
委閑將同守備各管領新軍一枝聽其操練俟營
伍既成另議發邊益兵備所駐地方卽部司所在
今日投文明日隨准支糧事體自易且監司督察
可免科索之弊又無工作之勞其於優恤尤便也

議臺官習藝

軍中所重惟戰守二事而戰守之實以擊刺爲先

今之車營戰中之守也沿邊臺垣守中之戰也二者相需不悖各守臺千把百總戰守相兼智藝並用固不得右領兵而左守臺也夫何自視爲輕不習武藝萬一虜酋攻犯憑何捍禦在平時責任固有輕重之分而有事之際俱係調征人數豈容有所軒輊卽今各該守臺千把百總仰各自置隨身器械一件不拘鎗鎗刀棍夜則在臺巡守晝則就近臺處所督同在臺南兵一體演習聽本協及本管南將不時臨邊或一二十臺或三五臺就便調比准聽本管小賞輕罰仍將賞罰過武藝等第報

查每年調集三屯考較之日先以試藝爲主次考行檢行劣藝精者姑與進一等行優者又加一等一體激勸若藝生行優者姑降一等行劣者又降一等重加罰治全不知藝者雖行檢無議亦以軍法責治降革如此則守不忘戰而擊刺日見精強戰熟於守而臨高不難拒敵矣

議買馬

軍政莫急於馬今之馬政莫病於買補蓋節年建議如追椿棚立勘合給椿單時印絡置循環定查叅無非重軍政而責戰守之實効邇因官軍校懼

叅罰每遇倒馬逼勒軍人私自攤補領馬之軍亦
懼責比往往變產鬻妻徑自賠償故買一馬則傾
一家死一馬則逃一軍甚爲切害今議定各營一
體俱用官朋之名而行私朋之術每二月之間通
計死馬之數每匹朋銀十兩在各路標兵則通計
一營在各捉本提馬軍在標下則通計各部千總
養馬者均勻公朋委官買補不必按季納銀亦不
必一槩三錢有死馬者則補無死馬者則已如或
不足以原軍椿銀加添以示倒馬之罰則區別悉
當勸懲不歷可免偏累不平之弊矣然各營路馬

匹齒有老壯歲有久近養有肥瘠其倒死者不責之償則蔑視其馬而死者愈多槩責之償則軍之月糧有限馬之倒死無窮買補愈頻負累愈甚合無將營路馬匹先查買補近遠併年齒老壯再驗臘之肥瘠分別等第定立規則填造簿籍如買補係十年以上齒老臘薄及對敵陣亡追賊走傷出哨倒死或臘分本壯忽生暴症醫救不及者預行告明查實止追肉臘併椿銀一兩五錢其五年以上齒壯臘實喂養不善馴至瘦損死者除肉臘外仍追椿銀二兩五錢五年以下死者除肉臘外追

椿銀三兩以示不用心喂養之罰庶軍得實惠官無私斂公朋之法莫此爲便

議撫賞

薊鎮之有屬夷國初恃爲藩籬今仍藉爲耳目故歲有賞予以示羈縻然撫賞錢糧有限大羊請乞無窮部落日增歲費日廣於是帑銀不足扣其月糧月糧不足繼以樵採甚至正軍不足連及餘丁餘丁不足編及妻室計日收柴計丁納銀剜肉補瘡剝骨見髓則軍不勝苦而逃斃愈繁矣推原其弊大端有七將官不親撫賞委之管墩夜人員彼

秩微力薄曷能彈壓隨其索求信口聽許弊一守
捉而下左右廝役率以爲利任意侵剋供撫夷者
什三充私囊者十七弊二錢糧給發每至後期萬
夷叩關急如星火不免揭貸出息或增價買物耗
費不貲弊三居常有坐門之夷臨時有候賞之夷
日日宴賞動輒百金不作正數弊四賊夷稍不遂
意輒作歹撲人該關畏罪恣行科派甚至千金贖
人以自免弊五或因錢糧不敷支吾無計則權與
賞票以自寬目前他日夷人持票而至信如左券
數且加倍以爲例弊六屬夷到關不問人數不責

非時不論非額一概濫與此關與之彼關相接弊
七如此則竭軍之力無以厭夷之欲有增無已將
何底極該當各路將官極力擔當破格區處先查
某關舊額應賞某夷部落若干原人數若干給賞
若干今增添部落人數各若干給賞若干應准增
若干量裁若干每年定擬賞額若干本關額發錢
糧若干商稅等項若干如不足應採辦易價若干
計處停當呈詳定議施行候放賞之期宣諭夷人
知會令各輸服每遇屬夷叩關卽飛報本管將領
親詣地方盛陳兵威以示彈壓應賞之外不許濫

用一錢一物該道置立循環呈請督撫印鈐轉發各路每季終將用過錢糧採過柴木賞過夷人數目併將官臨邊時刻一併填註倒換其應發銀兩每春季以上年十二月給發秋季五月給發預辦賞物以備倉卒其軍人採辦柴木半歸官半給軍免生嗟怨如有將官不親撫賞者以怯懦不才叅究守提以下或扣軍糧匿採辦併濫賞非夷預出賞票等弊定行拿問照沿邊錢糧坐贓重究仍於本官名下追償所費其有夷人作歹撲人追究原係某夷先革撫賞設法追捕捕獲仍以功論不許

科眾取贖自干重典此款關係軍機安危夷情向
背爲今日邊關第一急務計處勿忽

備征餉

軍行糧從勢所不免邇來薊門一切修守防禦之
具略已具備獨軍中輜重久缺不講今議造輜重
車業已垂成其各營路應用煤炒合行酌爲定規
預備文到之日各兵道照督撫原行會同管糧衙
門遇兩防先期動支客兵銀兩酌量合用煤炒多
寡分發各該州縣專委的當官如法製造另行委
官看驗如果堪用運付各邊倉口收貯專備有警

支用如秋防無事不支聽來年春防支用如春防
不支卽於五月內不拘主客兵軍行糧內通融搭
放務期盡散六月初麥熟價平之時仍前發銀造
辦七月內運付各倉隨年支銷仍行各營路官軍
每防預支行月二糧兩月自備煤炒候警應用

三月方山人邀遊山庄感而賦詩

尋芳長嘯到林邱謝眺庄前控紫駕白雪滿枝臨
月塢綠霞遙樹抱春流石牀未醒寢中夢羽服誰
同物外遊醉挹韶華問花事從來不解破邊愁

夏四月同諸幕客遊方山人景武山莊有賦

何處開新畝誰憑識舊遊杏林金作塢瀑布玉爲
樓客盡江南勝身仍塞北留鐘聲林外急倏起戍
城愁

五月直隸巡按蘇公士潤題爲議處清補軍役以
實行伍以永邊儲事內稱總理戚某撫恤得宜而
行伍咸充勾補克勤而緩急有賴部覆奉旨賞銀
十兩

秋七月同山人登三屯陰山

詩云秋入千山靜東來紫氣多德星高可摘碣石
醉堪磨九塞勞車馬孤城傍薜蘿偶聞擊柝者回

首愧烟波

八月條呈大閼事宜

左司馬汪公道昆奉詔閱視薊遼家嚴條上事宜
略云內閣原題八事內積錢糧等五事兵部原題
六事內定戰守等三事俱係境內事情責任所關
已經節次遵奉修舉大率隨事効力以永實効因
事竭忠以求成功至於轉移之機以挽回人心爲
本拔去病根爲難除將本鎮節奏督撫申明及道
司議擬本鎮謬舉見之施行者逐一查覈備載文
冊外所據事蹟數目具冊呈覽伏惟照裁幸甚

一定戰守查得薊鎮之守以險險隘之設以形今
將隆慶三年三月本職兼任鎮守以來節該督撫
會議題奉欽依酌量衝緩建築空心敵臺除昌鎮
外薊鎮共計九百二十餘座六年春防臺工甫竣
復令主客官軍修剗偏坡無非以守爲上策守固
則不戰而屈人之兵何必兵刃交接始謂之戰謹
將本鎮守臺事宜併礮哨烽火等項已經修舉堪
爲憑恃與尙該議處者通行開具詳請候裁施行
一諭屬夷查得三衛屬夷陽順陰逆外挾二虜疆
梁以要我撫賞內探諸邊隙漏以逞彼逆謀勾引

泄露無所不至近奉本兵計謀廟堂謨略備行喜
峯口關於放賞之時通集三衛頭目嚴加曉諭播
揚天威震讐夷類靡不俛首嚙指誓無他志且經
督撫節諭守臺壯士凡屬夷叩關意氣輸服真實
者厚爲犒賞如有狡詐妄求拿人挾賞等事卽行
督兵捕剿以遏邪謀邇者馬蘭谷石門等處擦崖
義院等關稍有微釁輒就率兵追捕盡行奪回此
其明驗所據甄別屬夷傳報虛實必書說信夷人
姓名及收養被虜均爲諭夷之策合併開悉

一修內治夫內治有二有心腹之內治在廟堂四

肢之內治在各省俱非本職所得與聞其邊方內
治則自邊牆以裏選將練兵節財省費及教練修
守鼓舞倡率興利革弊等事而已夫攘外必先安
內修己乃可治人元氣既充則百骸自壯邪不得
入且練軍之典選將爲先往年官以倅進事以苟
行賢愚之辨略無勸懲是以上因循下苟且今年
考察之典先於將領次及頭目不才官員汰斥殆
盡除已經遵行外其守邊則以足兵爲先足兵尤
以清源爲要欲關塞足守而不稽之衛所是猶緣
木而求魚不可得也已經節奉督撫方略稽考軍

佐緝捕逃亡至於內地之城守邊關之樹藝皆內
治餘事而科斂打點等弊悉爲內蠹不可不釐益
私斂必起於公斂公行而私效之本職任事以來
遇有公務費用必不可已卽官爲處給差委文武
官員公同幹辦不復科斂於下庶人無竊取軍受
實惠夫事有因革政宜損益本職猥以愚懵力爲
擔負凡有措置已見施行查照各款附錄外有議
而未行事宜未敢遽已合行一併開報

一積錢糧查得師行糧從勢所難免如不叅酌虧
情無故空行不惟錢糧有糜費之繁抑且士馬受

奔馳之苦非計之得也薊鎮以守爲主邊長人少屬裏近逼牆外故無論四時俱不能一日缺人乘守十一路主兵各照信地止支月糧原無行糧料草並非變主爲客伍標標兵無事各駐軍門撫院總兵二副所居城內並無差遣支費行糧春秋兩防客兵到邊各照信地俱係百里之外行糧草料自有常規其本鎮自三年三月到任以來節次開過逃軍月糧布花減過入衛官軍省有錢糧逐開於後惟請加討南兵九千餘名月餉派於各項節省內支給今將本鎮兩防照舊分布隨警摘調以

省行糧事宜合併開悉

一修險隘薊鎮倚山爲險就山築牆延袤二千餘里非不險也第單牆一綫界限華夷水口間斷不接山勢夷峻相雜形孤勢格官少而約束似稀間絕而號令不聯賞罰未及是以人不知畏且牆身低薄山梁脩峻夷虜以聚攻一面而專我以無所不備而寡當早爲綢繆之計其臨邊腹裏村落係于民社墩院土堡責任有司今蒙兵部具題之意大率以本鎮之險未完故有此議然薊鎮自隆慶二年以來節蒙督撫方略司部議題奉欽依創建

空心敵臺兼築偏坡功已九仞似有屹然可恃之
狀誠爲先處戰地以待敵者也謹將修過臺座數
目併偏坡丈尺凡事干設險者及已未完事理合
併開悉

一練兵馬看得沿邊兵馬不惟不練亦不敢練不
惟不敢練亦無兵可練有一二操演之法又皆徒
爲文具所習非所用所用非所習其於戰守何益
堂堂之計絕口不談以合衆爲迂謀以短戰爲浪
說人心膠固習於剿零自保久矣若不堂堂一戰
即多方設敵便得一勝黠虜以爲誤中非眞勢力

不敢必不革心斂畏自職任事以來始講堂堂實戰之策授以戰兵搏鬪之具不惟士大夫之議不合部將士亦多腹誹之而不以爲然也向以臺工方興主客官軍無暇及練雖並行不悖實一暴十寒今秋罷工以來始得通行教習必求堂堂一舉庶可爲數十年幸安之圖所據行過訓練行伍分定援兵議擬賞罰等事均與練兵事體相關合行一併開悉

一整器械看得薊鎮自隆慶二年以來緣創造戰車請發官銀四萬餘兩共建大小車計六營共一

千一百九輛輪輜相望轅衡比肩真所謂運有腳
之城策不餉之馬無往而不利者也至於隨車郎
機火礮等器禦虜虎蹲礮大將軍等項威力頗雄
比昔拒虜之器止於弓矢鎗刀等器大不相同其
十一路各標軍士執把軍火等器俱經逐件更造
新堅鋒利每一火器配有各色什伍分別備征操
演等項又較虜人所用器具長短遲疾爲之稱干
比戈務求先發制人之算通行給用各有領狀附
卷外且內多舊器改發不煩官帑所謂化無用爲
有用費省而功倍者也所據車輛器具等項合行

一併開悉

冬十月策議駐守事宜

近該閣部議共十四款除應職具冊外有不敢越俎如明應援該職看得宣大遼保之援節年題奉欽依事例臨行調度宣大自有軍門水鎮有難預擬遼保之援卽薊鎮軍門所得總攝隨警策應當奉帷籌本鎮卽十一路之間隨賊向往相機戰守皆候督撫方略臨時議擬有難遙度不敢擅議如處京營係在京禁旅臨時請旨定奪該職往日任京營副將亦有愚陳先任福建因詔求直言每有

拙稿今俱不敢費陳如開屯田自有屯田御史管
理衛所皆徑聽查比徵收如理鹽法自有巡鹽御
史專管開申支銷俱屬有司職並無統攝無憑修
舉如牧胡馬係宣大山陝遼東夷情本鎮不通互
市固閉關隘並無胡馬牧行外惟申駐守一款該
職會議看得薊遼去京不遠一牆之外卽爲屬夷
苟或拒堵不前動致震驚輦轂東之漕糧西之陵
寢又皆重大之寄不容少緩殷鑒不遠畫策宜詳
近蒙閣部議設本兵大臣二員坐鎮通昌誠得居
重馭輕之意其合用兵馬應候軍門裁示未敢擅

擬但芹曝一得之愚有不敢不申言者昌平一鎮
係屬軍門統轄倘彼處有警昌鎮兵馬卽應屬之
駐守大臣該鎮總兵卽應聽大臣調度爲主兵而
所屬各路邊兵爲翼通州叅將官軍卽屬通州駐
守大臣爲主兵而保定總兵提兵入援亦必先到
通城卽聽駐守大臣合爲一枝兩處各有萬餘勢
匪輕小如賊果近昌平則以昌鎮之兵爲正而密
雲標兵爲左翼宣大援兵爲右翼遼東之兵以次
而進賊如犯通州則以保定人馬爲正而昌平標
兵爲右翼密雲標兵爲左翼宣大自西策應而東

遼兵自東策應而西本職督兵不拘賊在薊鎮昌
鎮通州願認居中衝突隨勢向往如果深入內地
逼近都城則昌鎮大臣專守陵寢通城大臣專保
糧餉未可輕動以薊鎮督撫本鎮之兵直衝其腹
心遼東總兵統兵爲左翼宣大總兵統兵爲右翼
與職犄角務決堂堂血戰此所謂恃吾有以待之
誠萬全之策也

呈請參謁閱視進止

竊照大臣初出職等皆有參謁之典境內將官皆
有迎見之規茲行也將士各因營伍在邊在臺跬

步難移惟進止號令是守所謂君命有所不受時也及追戰之際旗號金鼓俱在行伍誰敢少一人一馬必不能撥發迎送俱關大臣禮節不可不爲預圖况職既不得赴參且臨到職又匏繫軍前營門之外不敢擅出柰又照此舉乃數十年未有人心正屬觀望以決是役必如臨陣一般實守實戰乃可若上下體悉不罪職狂妄專恣因而明節制肅士心收萬人一心之效乃在此舉若上下嬉恬仍襲舊套以致令撓事擾因而壞節制散人心將數年之勞棄於一旦亦在此舉况軍中事體於大

臣之出禮節儀文不無背馳倘議不同甯可暫輒
閱事亦走而奉迎大臣也乞先會明依期到牆子
嶺詣宿臺上開看操臺實守之法俟烽火報至卽
隨車營徑來馬蘭隨軍親視實戰之法俟至大安
口事畢職與大小將領謁於行次次日領賞畢請
同到三屯營或遵化自後照常行事各將官照常
恭謁迎送乞會大臣各出一檄禁約使諸將有所
遵守也

合練全鎮兵馬實守實戰條略

竊照教練之方技藝易熟而難精人心難轉而易

惑今練習技藝之術不過歲餘收効何待數年有成但薊鎮以守爲主而邊牆守具疎簡修守事繁版鋪爲急故自職任事至今節該督撫題奉欽依築臺修邊剝坡繕城加以邊軍原有撫賞撫辦之責是以未得盡練先將設立五標練爲車騎馬步等營以爲東西應援隨賊向之用近於隆慶五年始蒙議允稍減工作兩防月練三日而十一路精健馬步俱亦頗就行伍但標路主客爲營計三十有奇而將領之數亦如之其分合之法趨援之方守臺守牆賊攻我禦之略及一應執把擊刺軍

器之具固雖一一授成件件給備各車皆已習用
緣向日止是小操分操俾先各諳其業而場肆之
聲容每紊亂於臨敵分教之縷析常絲棼於合營
又以眾寡不同而合教之道未舉是以從來操演
官軍每不効於出陣蓋以既未試於真境抑且人
心難轉徒飾貌觀故力奮而不齊勢分而不屬職
此故也况薊門二千里之邊十餘萬之眾邊長兵
寡無所不備五標十一路兵馬分置擺守相去頗
遠必須實如賊至試眞守眞戰於臺牆之上必士
卒眞有能戰之勢而後可期固守之安則合戰之

教又所難遺否則主客將領三十餘枝聚則何所次第行則何所後先車騎步三者何從而更番迭出地方長短廣狹險易倉皇何辦皆當預試俾其習熟然後可用苟爲不然職數年之功竟作虛幻杳冥而臨時之際仍前張皇錯舛無所措手足矣今仗本部院帷算之下稍已成格相應眞實試演以收實効夫職方寸報主之誠固盡心盡力願殫竭圖爲以奏膚功而彰明効矣第事體重大非仰仗明威指授何由得圖萬全職復思督撫移鎮於臨邊兵馬列守於營寨牆臺烽火之舉動調度合

戰之聚散萬一誰傳之言布滿道路流播都城不
無生擾仍乞預爲題奏通行曉諭以免阻撓邊方
之大幸也除通閱戰守調度防範各項數目另行
開揭呈詳外所據校閱緣由合行具呈伏乞一面
題奏一面乞將揭內條目特賜裁酌早爲頒示以
便刊布通行令各該標路主客將領及各該戰守
人員一體遵照曉諭各軍兵遵守施行

合練約法

一馬蘭谷副總兵楊鯉宣府入衛遊擊楊振充塘
馬官專管粧賊塘馬其塘馬卽以楊鯉下援兵楊

振下入衛兵盡數充之而副總兵司其號令調度
進止衝戰時躬自領來敵陣
一管南兵將官西路附密雲車營而行東路附近
昌車營而行

一應調東路只行文史綱應調西路只行文張臣
而二協速調所屬向往差遲號令則二協之責諸
將不遵二協者罪在諸將

一凡調車營卽原配車內馬兵同行並不又開馬
兵等字各路原不在車人馬不必動

一調路營則只各路主客赴調車營及車內馬兵

不必動

一調標路軍馬則車營及各路馬營盡數以行
一密雲左右石匣振武四營總稱密雲標營四字
則四營俱依令行並不分書

一遵化左右建昌車馬四營總稱遵化標營四字
則四營俱依令行並不分書

一凡各路援兵只稱路營主客俱在內並不分主
客字

一凡各標只稱標營車馬在內並不分車馬字
一稱西四路則石塘古北曹家塞牆子也

一稱五路則馬蘭在內

一稱東六路則山海石門燕河臺頭太平松棚也
一稱塘馬則楊鯉楊振俱在其內

一稱標路二字是舉一鎮車馬標路主客俱在其
中矣

一西路主客援兵地平爲一大營乃四營也如不
足四營則三營二營皆可合爲一營東路亦然占
險每三部爲一營

一四營合各以左右二部爲外層中部爲子層外
層主客將官分主之子層各中軍主之每營爲一

面

一三營合以二營自前門居中分以一營在左左部至左前角止中部爲左牆右部爲後牆至後門左止以一營在右右部自前門居中分在右至右前角止中部爲右牆左部爲後牆至後門右止爲牛層爲區營又以一營居中以左部在前一面右部在後一面中部一司在左一司在右爲子層亦區其各雜流爲中軍將官各照本營主客分認一面一二營合每營以一部當一面俱自中門分以各中部合爲子層

合練申令

一應出口哨夜照舊出口架礮

一墩烽官軍上墩聽候傳報烽火

一十一路粧賊塘馬且於各家丁援兵內照先操
臺牆之法撥出口聽候惟馬蘭路援兵一部家下
等項盡數出口聚攻平山頂東西牆鮚魚石關一
帶

一二十二日寅時自平山頂烽堠起左右分傳烽
火一次石塘嶺古北口曹家寨應援馬軍及在彼
應援標兵俱見傳烽至便由大路先赴太堡莊地

方等處向馬蘭口路分劄營聽候又不可東下太
遠恐牆曹有事返應不及須在牆子嶺順路之口
若離東來路頭稍遠又恐賊入時馳援不及此當
活便一面差人於鎮虜營邊上擺設三里一撥探
瞭烽火其牆子嶺與窄道共路且嚴加乘守

一山海石門臺頭燕河與遵化建昌各標兵但見
傳烽過與東路相連就起營到建昌等候差人於
冷口瞭看烽火

一惟馬蘭谷傳烽火起各路烽火通照馬蘭谷所
傳挨接傳去只傳一次乃賊初到邊下也各路將

傳過烽火時日或晝或夜旗火數目聽本路主將
提調通報督撫鎮道副總各衙門知會報內不許
差了烽火旗號時刻數目誣枉不小各官務要仔
細看過或寫字誤書拏來以軍法從事違者發撥
馬飛傳將兵皆知馬蘭緊急且不可動照舊各於
信地牆頭上守戰

一二四日早塘馬攻戰一次於鮚字西四號臺
空作登牆狀本鎮統領南兵爲前列家丁在中左
右營馬軍在後假如原駐正關不意賊登前處乃
部前兵馳至山下仰攻其機不書賊敗出牆兵收

且守牆上俟賊遠退狀收軍向下行器向後刺至
山下馳平地方合營查功

一 本日申時攻打平山頂西空做賊入狀本處東
西烽堠連扯旗傳烽二次東西各標路車馬援兵
探得連傳或旗或火二次盡數馳赴信地西係馬
蘭東係湯泉

一 西四路營馬援赴石門驛東六路營馬援赴大
安營俱照欽限一百五十里馳來合營

一 西五路尖夜貼練步軍照原定營伍由邊趨馬

蘭營關一帶暫住

一東六路尖夜貼練步軍由邊至冷嘴頭沙波谷一帶各城內暫住

二二十六日東西路南兵副將遊擊各統南兵李超則馳赴馬蘭合調到西四路尖夜並貼尖步軍聽令楊文則馳赴冷嘴頭合調到東六路尖夜並貼尖步軍聽令

一所在尖夜步軍俱聽東西路領南兵副將遊擊總督提調守備一體遵奉調度進止違者以軍法從事

一二十七日平明賊開營南搶移劄湯河我兵車

馬盡數黎明起營移到魏家莊西南全鎮會齊
一劄營進兵皆以三屯標下兩營分左右總鎮統
之以充中路當鋒

一密雲兩營車平行列爲兩路行營到時居總鎮
之右地勢隨便相去一鎗所不到之地地狹稍近
關稍遠

一遵化建昌軍各爲一行營兩營平列同行到時
居總鎮之左地勢何如照密雲兩營列行
一路營援兵每到應該劄營處卽挑濠

一西五路主客兵到合營地方有四營則牆子嶺

爲前面曹家寨爲左面古北爲右面石塘嶺爲後面三營則在前二營爲外面末後一營爲子層共合一大營若未到齊之時各自爲一營

一東六路主客兵到合營地方有四營則石門寨爲前面臺頭爲左面燕河爲右面大松二路爲後面三營則在前二營爲外面末後一營爲子層共合一大營若未到齊之時各自爲一營

一各營號令無賊時起止向往下營列陣晝夜守禦聽在前之營爲主在後之營一依號令而行賊至各聽各面將官號令攻打卒然遇賊以有賊相

近之營主號令各面各將亦有賊犯則一令而行無賊所犯者不必舉動以耗人力火力也

一塘馬到湯河作劄老營狀標營三標六頭併列輔重營在後卽時追至湯河大戰

一塘馬於湯河戰畢分爲三枝一枝伏石門南山一枝伏李官屯一枝南走小喜峯口俟我兵追戰過湯河南一半路伏起衝戰

一戰畢下方營掌號笛發放而賊又自山外衝入我先發南兵伏在營外夾道俟賊到車前酣戰時南兵伏起交鋒塘馬作敗狀退出口子再不復回

一 本日晚車營劄小喜峯口各照地方西路馬兵
移到石門東路馬兵移到湯河照地方各哨自爲
一營互相犄角

一本日去賊十里之內塘馬發一千名前來遶車
左右前後索戰車營緩行賊遠一里餘我兵不應
只管行如至五六十步一面行一面發銃待我兵
行至賊大營一里之內賊來急攻照常操大戰賊
退稍息將行營下定只是然銃放火箭攻逼之粧
塘馬做敵我不過之狀又做人眾緩行之勢車營
亦行待行數里外過小喜峯口相迎賊馬做過不

及之狀車營三標齊列通戰不止塘馬作四散奔
山逃命之勢車兵各擇地下方營大約每營相去
一銃不到之地

二十八日早塘馬由水門口進入劄營整眾我
軍報賊由水門口入苗頭向大安口出各營將領
俱赴總鎮營中會計畢追賊是日三屯爲前鋒二
車營並行遵化次之二車營並行密雲又次之二
車營並行西路馬隨後東路馬又隨後輜重營在
馬後其馬兵行營每一營三部卽爲三頭西路不
拘幾管俱營頭平列東路行在西路之後路頭俱

同

一步兵沿邊牆來此大約也若遇陡山斷崖灣環路遠之處不妨下山離牆取捷馳應但遇見賊馬便登山傍牆臺依險前進未見賊時不必拘泥

一西四路南兵步練尖夜無馬之軍俱以南兵爲首次馬蘭次牆子次曹家次古北次石塘東五路南兵爲首次松棚次太平次燕河次臺頭次石門不拘軍之多寡每路尖步爲一段行戰爲一陣列或本路軍約其多寡司局不同自爲三頭平行務相連接由冷箭頭登山西由大毛山登山俱依附

牆臺隱伏旗號向賊所出大安口來近口各劄於臺內併牆上偃旗息鼓坐待虜折牆出口一半望見自南來大兵俱至卽於臺上大張聲勢呐喊放銃截拒不許再放賊馬過口

一車騎主客各營二十八日早追賊向大安口行至大安口營城車止照行營三節列之居督撫其中爲老營南兵步行標路北行仍騎馬聽放礮吹擺隊伍喇叭點鼓車內馬軍各爲一路而出東西路馬兵盡數急馳俱到大安營城北一字列陣一列陣總鎮領三屯南北標營居中遵化標營居

東哨密雲標營居西哨路營每一營主客將官爲
一頭立爲一路各營家丁護將官爲一族當頭領
鋒西四路營列於西東六路營列於東南兵爲前
鋒各營俱去南兵十步每營左部在前中部在中
向前策應右部在後專備後面之賊凡陣一字列
一營盡又平接一營仍俱騎馬點鼓緩行中部去
左部三十小步右部去中部三十小步

一約可下馬時聽中軍放礮三箇我兵下馬塘馬
吹觱篥回頭凡我馬軍前層中層馬俱牽在中層
之後後層馬牽在後層之前每火兵及第三伍一

名擎馬每人都擎馬五匹立定不必前去每馬一隊
直畱一空待後層兵穿過

一虎蹲礮大將軍火箭車俱出南兵之前緊緊相
聯擺下

一賊衝來先小鎗次虎蹲次大將軍火箭俱聽號
鎗舉放

一賊收各軍步追一字向前追至大安口關相去
一里之地虜馬盡數返戈死戰我軍盡力作殺砍
狀賊倣敗盡我軍俱追至牆上聽鳴金收隊伍
一收隊伍除南兵外北軍仍爲三層聽轉身喇叭

收至馬邊各軍聽吹哱囉土馬大吹打各軍歸原營

一操演之時十一路內倘或真有賊警竊於別路乘虛而入但百名以上卽舉旗火左右挨傳合馬蘭分數者爲習操但係別路分數卽爲眞警盡馬蘭兵馬見在地方必無他虞惟各路兵馬調來空虛其墩烽當以此辦之

一諸路官兵赴閩之時各路不無空虛誠恐奸細預將日期漏洩臨時或有意外之虞卒然竊發兵力不支拒堵無及不可無慮合無先飭各路將領

各營官軍除應援兵外其餘不拘馬步盡數上邊
分投擺守在臺者不係應調之數不許下臺留守
將領用心督備以防不測仍行各路將官嚴諭尖
夜不許泄露閱期其該防尖夜內多選老實之人
先十日遠出住哨只待閱畢仍回各路方許進口
一各軍自調奉之日俱要將軍宿野其炊煮樵汲
之具雨夜之備俱令預行辦足臨時缺乏查照所
欠自將官以下挨次連坐

合操營陣說

一操馬營衝戰

總計六標東西各路共爲哨十三初一日早各車營俱掣南山下仍照教場劄營訖馬兵盡出車三屯左右遵建太馬石七營列於教場東前一行三左二行三右三行遵四行建五行太六行馬七行石密雲左右牆石古臺六馬營列於教場西前一行密左二行密右三行牆四行石五行古六行臺一操馬兵自南向北看先三屯左居左之西三屯右居三左之右遵居三右之右建居遵之右四營每部一頭共十二頭平行爲第一段行盡馬蘭三部每司爲一頭六頭並行石塘居馬蘭之左古北

在石塘之後燕太在馬蘭之右臺頭接燕太之後
每部爲一頭與馬蘭六頭亦共合十二頭平行爲
第二段西列四營轉頭向南遇中道來接轉頭向
北密左居密左之西密右居密左之右牆子居密
右之右石門居牆子之右每一部爲一頭共十二
頭行爲第三段

一行向北遶教場後山上過由教場西河邊直到
南山下前十二頭轉身向北正對教場大臺鳴鑼
坐俟塵息聽吹哱囉起身塘馬報虜賊不知其數
正衝我兵而來急照圖搶方營每營左右各爲外

層中部各爲子層左右遵建爲向北四營平列各爲方營石塘爲左面北接三左古北爲左面北接石塘燕太爲右面北接建昌臺頭爲右面北接燕太各以左右部爲外層中部爲子層馬蘭爲中營六奇俱爲一層密雲左右牆石爲後層南四營平列左右部各爲外層中部各爲子層營定賊預伏四面齊衝我軍鎗礮輪放次火箭次虎蹲完卽出殺手照常操例殺手步戰完卽出子層馬兵追戰完收畢各聽令坐息

一請令列三疊大陣血戰十三營各將標兵先隨

本府南去各占地方立定從南頭各營分搶地方
向上列爲三層照大安列行戰同只一二層追戰
如令第三層不動前面正戰將畢之時賊馬由後
面發衝我第三層兵就向衝之十二營中部兵卽
返身向後應援前後賊敗收隊大吹打收營仍爲
三層再聽令點鼓徑歸劄營地方

一 操南兵迎敵

一行營十二頭行列三疊陣以二部鳥鎗爲第一
層又以三部鳥鎗爲二層又以殺手三部爲第三
層又以殺手二部爲第四層照常衝戰衝戰畢請

下方營

一方營八部爲外層每層二部中門分起角上止
第二子層每一部爲一面兩把總分門起第三子
層每百把總爲一面下方營樵採發放俱如例
標車行營衝陣地方

左營西轉向上西面臨中運東界

遵標西轉向上 建標西轉向上 遵輜不動

右營東轉向上東面臨中運西界

密標東轉向上

石標東轉向上

三輜不動

布置方營地方

三左營當中運東西分共二十四丈

遵營在東西面去左營東面十二丈

密雲在西東西去左營西面十二丈

三右營南面之中對左營南北相去十二丈

建營南面之左對遵營相去十二丈

右營南面之右對振營相去十二丈

南兵營入中中北對左營南對右營東對遵輔西

對三輔

遵輔左中南對建營北對遵營西對南兵營

三輔右中南對石營北對振營東對南兵營

石營相去二丈十三輔相去二丈十密雲

丈二十去

三石

相去二丈十南兵相去二丈十三左丈二十去

標車營合式

建營

相去二丈十遵輔相去二丈十遵營

各營相去各十二丈如營有大小不同或地有險
阻卽多數丈少數丈亦不防但要外面四方取齊
或隨地形亦聽其便

閱視至湯泉合練諸路兵馬車營軍伍戰陣之制

時汪公奉詔行邊視師家嚴合十六萬之眾連營數十里召各路將領悉合練於湯泉於是首舉烽燧山谷響應不移晷而關塞悉週臺牆耳目自申令而一新矣次出車攻或合戰或出奇或遮前或轉後險易各宜有迫奔有迎擊有扼塞有邀截步騎互用部伍營衛以守而爲戰矣次發火器雷電交作一發機而無堅不渝矣次列步戰臂指相聯主客組練番休以裕其力相衛以成其功一鼓勇而爭先嘗敵矣次用馬戰馳驟風雨人馬相得縱

橫原野進止歡騰而厯塊無險矣次操臺牆則依
險乘高雉堞皆可用武攻禦不越常埠藩籬嚴設
而制勝在我矣比課諸將皆七尺自負以肩國家
較諸兵士則分數刑名各司其局躬入營壘則車
騎卒伍各程其材驗諸器械則弓矢礮石干櫓戈
矛各程其用履諸關隘則樓觀亭鄣居然百二金
湯登諸臺垣則山海間枹鼓相聞十二路旌旗雲
列厯諸城堡周覽闔閭則署有餘含神有壯宇民
有窟居幕府有左右標輜重無缺奇兵有營武場
車廂咸飾遼成新伍之區莫不秩秩如也其間守

文者什七用武者什三兼資並運一皆本於忠愛之心夫非干城社稷而鎖鑰疆場者乎且屏翰有年勞績久著於是使者銘石燕山以紀功績而且疏請久留勿他徙云

先是家嚴自嘉靖庚戌部民兵戍薊知邊事狀謂九邊當有重兵乃可稱雄宇內丁卯奉穆宗皇帝召自閩浙鎮守入忌者置副京營尋出總理因諸邊赴薊踐更遍察軍情虜狀戰守胥無足賴乃疏建騎牆空心臺復陳邊事得失更議創車爲戰五兵長短以配必求與虜長者習之有條約實紀授

將吏柰狃故習者謂虜不可敵兵不必練車馬不相及臺牆不足據羣議闕然聞於司馬門越五歲議乃寢邊士咸移所習始知足賴爲固益具設而勢重故也但兵未合練擬以壬申初冬合練於湯泉適朝遣使者閱視以欵人侍郎汪公贊職方郎左公天津道楊公從總督劉公巡撫楊公陪密雲王公薊州徐公永平孫公諸道咸集而薊之諸將悉破前弊皆効情實願請當虜一戰宜如對壘而練之使者曰然乃先閱烽火不移晷而千里遂拒牆下如平日牆操狀假爲虜將入次則內犯狀集

全鎮標路車騎如期赴敵次以車騎大縱野戰次爲夜戰次爲虜將出口狀諸步卒拒於牆俟其出截擊之凡標路騎兵但下馬步列若爲孤注殊死戰其有奇兵南兵則機秘不使之知閱竣大飲使者同督撫前坐以下左右之置家嚴於賓席謝不敢當使者曰是將夫子命以待有功者幸毋固辭乃自引於側大酣而罷是閑也兵士以十萬計車營九將帥自副總而下材官以上無慮千人乃賦詩以紀之云使者臨關日擁旄天威咫尺壯神皋指揮乍結車騎陣戰守還憑虎豹韜萬闔凌霄金

作壘五兵飛雪玉爲刀年來愧博君王寵幸有邊愁識二毛

十一月上政府大閱事蹟

閱視事自十月二十二日傳烽二十三日操臺牆
守禦起以及合戰於原野追戰於關口是日貢夷
適遇見之又操閱於教場車步騎諸營伍伎備軍
器無不逐事陳列俱經奉閱訖諸將乃蒙閱視大
加賞賛鼓舞至馭本職賓禮職雖竟不敢當然破
格榮寵誠出望外敢不西向仰戴天恩惟有竭力
邊圉庶少稱塞於萬一耳其馬蘭起直至大安口

諸臺險已經宿閱三日十一月初八日乃往賽答
子溝口外二十里柞子庵看所創外險登臺閱歷
無處不至又由潘家口邊外過喜峯等處而中鎮
馬松太三路閱完又十一路官軍就於十一日部
司各道併天津昌平二道一齊分點比較武藝對
驗腰牌兼散欽賞并無虛冒各委官徑自回報閱
視訖本月十九日閱視由內路往昌平事竣計在
臘初仍由石塘嶺以及古北曹家牆子密雲閱邊
畢仍由內地徑至建昌燕河臺頭石門山海各邊
關過度歲後出閑向遼本職自入薦數年以來仰

奉碩畫雖百務修創似有章程但非今日合操一舉猶未免隔靴搔痒耳況職援枹二十餘年亦未見十萬之眾諸路固皆分數中心實屬恍惚近得共集連營始知十萬作用又似稍有豁悟乃信邊事真有可爲今於大同小異中再爲調停須用醫家倒倉法即可爲畫一之策此番經制一定永不更張則衛兵可遣兵額可執戰勝守固如持左券矣大端入衛兵既罷必用加主兵馬匹以路爲額以標營搭配每一路並標合一車營一馬營共爲車營十馬營十每一路軍尖夜步練等選擇領馬

務足其數不領馬者運車仍添戍南卒每臺二十
名上下將邊臺專付之以圖固守乃長計也惟有
練兵一節標路將官心痼不轉任是耳提面命畢
竟視爲末務至有言從來只是與虜遠遠射箭挑
濠而已其學武藝廝殺不成且略學之應官府等
語本職數年以來極力優遇將領人心頗感只此
一番操練已行綁及叅遊嫚罵督責不少假借數
年之惰一旦廢盡惑者畏之怨者怨之眾將始知
毫髮不容以僞耳今奉明勅內開各邊文武諸臣
與有修攘之責果能眞實修舉著有勞績比照擒

原人臣主言卷之十一
斬事例重加陞賞如仍踵襲故套搪塞誤事卽照失機律例從重擬罪今除比例分別等第通呈閱視及軍門轉題外若不盡治一二卽諸將之念斷不肯轉移練習之事終不可入彀此轉弱爲強罷客兵大機括所係也再照九邊之軍計六十萬可兩倍於虜今兵益不足而虜益日橫每入則無兵以支豈無其故哉豈終不可爲哉若必聚三二十萬在一處與處處有三二十萬軍自古以來亦不能也以職思之只是分而能合茲欲無所不備而又不致無所不寡彼虜倏聚而十數萬我亦倏聚

而亦有十數萬未必無策惟斷乃成况逢少主英
明恩臺曉暢邊情明如觀火譚汪等在本兵劉楊
等爲督撫名世之才濟濟當路又俺酋等以互市
糜於北土蠻等以先聲奪於東此千載一時也倘
破格一處東警則東合而成十餘萬節制之師西
警則西合而成十餘萬節制之師既可與虜堂堂
相敵庶乎短刃接戰之後人情大定士氣已奮虜
膽已寒然後惟吾所欲爲邊塞可以久保安靜而
幕南當無王庭矣職不揣非其人緣經此大閱得
覩兵勢中機括一念捐軀竭力報主恩報知遇之

枕不能自己乃敢發大難之端少備一擲而已
呈閱視乞題建完原議臺工

邊事至於今日悉知空心臺之創爲守邊千百世
之利但自鈞臺行後僅得九百餘座遂以姑恤人
言輒止所欠不過一二百座則成全功矣阻於九
仞固爲足惜尤恐他日失事皆未完之空也萬一
猾虜乘空得入人將謂臺不足恃紛紛歸咎誰與
辯之何惜一簗之功而遂費數年之勞於無用之
地乎此職所不省也設使果念軍勞停此而不爲
猶可却反此衙門稱修倉廩營房彼衙門稱修偏

坡水口一軍而二三處徑調不惟將官不能主並
軍門亦不得主軍工愈多愈勞誠可痛哭伏乞趁
今閱視有險阻之責煩題原議造臺三千座已及
減議五百座今二鎮止有一千二百餘座除昌鎮
外薊鎮空隙尙多所少不過二三百座主客官軍
盡數派臺務要一防全脩疎隙大約以二百座爲
率通行完報以後再不做臺秋防休息操練其有
別工於二年取次興舉此薊門必固之守萬鈞干
繫乞蚤題請以便申飭版鏟之務

十二月巡邊至山海關陪閱視少司馬汪公大中丞

場公駕部左公任公憲使徐公王公同登山海關之
觀海亭暨關城樓各賦詩爲適

賦觀海亭云曾經澤國鯨鯢息更倚邊城氣祲消
春入漢關三月雨風推秦島五更潮但從使者傳
封事莫向將軍問賜貂故國滄茫看不極松楸何
處夢魂遙

賦關城樓云樓前風物隔遼西日暮憑欄望欲迷
禹貢萬年歸紫極秦城千里靜雕題蓬瀛只在滄
溟外宮殿遙瞻北斗齊爲問青牛能復度願從仙
吏授刀圭

是月除夕同駕部左使君薊州徐使君檀州王使君集民部侯使君署中爲賦度歲

賦云絕塞無烽紫氣浮一時軒蓋愧同游使星天
地看仍聚子夜招尋醉未休臘盡忽驚雙鬢改北
來已是六年留丹心不假殘杯力笑倚空庭拂蒼
緜

附創修灤陽驛記

今之驛卽古之郵也郵以傳命走兵符也而飭行
厨以供節使以承官輶以柔遠人往固七諭國初
尤重馳驛朝給符驗一二道不等以彩繻爲之組

兩赤畿於上作急馳狀前書聖旨所以防濫冒而
肅供應也二百年來文教日盛法禁日弛士夫廩
俸日薄往來道里中繻符有限乃書字號於關楮
取給於驛傳人得而用之達諸天下無撓者其後
奸宄生而弊滋甚卽士大夫私橐一槩藉此以轉
於家雖以下僚行其輶重肩摩輒百扛嘉靖間權
貴柄國賄賂大行絡繹相望而驛始疲昔費百金
者今費數千費千金者今不啻數萬矣諸省郡邑
有編戶者每驛數十戶每戶分日以十數計遇有
火差十數日而後竣至費千餘金海內虛耗民不

聊生此其最也世宗聰明天啓末年知權貴之弊
盡發其奸與天下更始繼而穆宗履祚方新軫念
民瘼不置兩朝先後柄國胥賢大司馬加意窮民
首嚴驛禁大中丞王公理禁獨嚴監司上下莫不
敬事無問他所卽鎮驛有歲積數十緡者有羨足
再供一歲者若今灤陽驛其一也驛在三屯鎮城
西里許自昔總兵駐師地又其西通遵化縣御史
大夫弭節焉再西則薊郡漁陽康衢矣其東至建
昌等邊營東北至喜峯口乃勝國屢出山後等州
路我朝三衛夷人貢市所經必中灤陽館穀而去

返亦如之其驛顧不重歟柰驛圯廢不知何年所存壞堵數丈規制亦狹隘茲已創舉車營及間閱邊伍肇建塞臺振新有次且也天威遠揚諸夷款順邊鄙幸以不聳乃率左右二營史君宸馬君承允吳君惟忠誠諸部士鳩材塞外依山澗以陶磚埴工方肇舉會監司孫公過之謂予曰此有司事向已謀之何獨累士伍與二三偏裨將軍邪卽傾金若干縉佐匠作費且命遷安尹趙公勸士士競勸工始於隆慶壬申仲春迄仲夏前後僅百日所期正廳三楹退居三楹左右廂六架前廳左右廂

稱是其儀門角門大門鼓樓悉具凡驛舍一所共十二間吏居三楹土地祠一驛面景忠山稍偏西登門數級至儀門更數級高亢當陽青山列障巍哉爲東郵第一驛舍也欲顏廳事以皇華之類嫌於襲故偶雨中檢杜集得輶軒有喜主客相安句遂題曰輶軒有喜云

戚少保年譜耆編卷之十終